



KEMENTERIAN SUMBER ASLI, ALAM SEKITAR  
DAN PERUBAHAN IKLIM

# SIARAN MEDIA

## **LAWATAN YB MENTERI NRECC KE PROJEK MENYIAPKAN BAKI KERJA BAGI PROJEK PEMULIHARAAN MUARA SUNGAI BESUT, TERENGGANU**

Menteri Sumber Asli, Alam Sekitar dan Perubahan Iklim (NRECC), YB Nik Nazmi Nik Ahmad membuat lawatan kerja ke Projek Menyiapkan Baki Kerja Bagi Projek Pemuliharaan Muara Sungai Besut, hari ini.

Projek di bawah Kementerian Sumber Asli, Alam Sekitar dan Perubahan Iklim (NRECC) melalui Jabatan Pengairan dan Saliran (JPS) Malaysia itu, melibatkan peruntukan berjumlah RM250 juta dan dijangka siap sepenuhnya pada Disember 2025.

Skop projek meliputi pembinaan benteng pemecah ombak di bahagian utara dan selatan muara sungai masing-masing berukuran 1.3 km dan 1.85 km panjang.

Projek juga meliputi pembinaan lapis lindung tebing di Kampung Sungai Nail, kerja mendalamkan alur laluan bot di muara dan sungai serta penyuburan pantai di sepanjang pantai utara muara Sungai Besut.

Projek itu dijalankan susulan keadaan muara Sungai Besut mengalami masalah pemendapan yang menjadikannya cetek dan menjejaskan laluan keluar masuk bot.

Pemecah ombak sedia ada yang dibina pada tahun 1998 kurang berkesan untuk menangani masalah pemendapan. Ini telah menjejaskan kelancaran aliran air banjir dari sungai untuk keluar ke laut.

Nelayan-nelayan juga menghadapi isu berikutan kedudukan jeti Lembaga Kemajuan Ikan Malaysia (LKIM) yang terdedah kepada pukulan ombak dan menyukarkan bot-bot untuk berlabuh khususnya semasa musim ombak kuat dan musim tengkujuh.

Projek yang bermula sejak 2016 itu tidak dapat disiapkan seperti yang dijadualkan pada Disember 2019 ekoran masalah infrastuktur dan kelemahan kontraktor. Justeru,

penamatan kontrak telah dibuat pada Disember 2020 dan kontraktor penyelamat dilantik secara tender terbuka pada 17 November 2022.

Penyiapan projek ini akan menyelesaikan masalah mendapan terutamanya di bahagian muara Sungai Besut, memberi perlindungan kawasan jeti dan bot dari ombak, serta dapat mengurangkan masalah hakisan pantai di kawasan pantai utara.

Selain itu, para nelayan juga akan bebas melaksanakan aktiviti perikanan dengan laluan navigasi lebih selamat dan terjamin dan menggalakkan lagi aktiviti ekonomi dan sosial penduduk tempatan.

Muara Sungai Besut merupakan laluan pelayaran utama bagi lebih 400 buah bot nelayan dan pelancongan untuk berlabuh ke beberapa jeti di kawasan tersebut termasuk di Jeti LKIM serta kawasan pelancongan dan persendirian.

Muara ini juga menjadi laluan utama bagi pelancong dan penduduk tempatan untuk ke pulau-pulau berhampiran seperti Pulau Perhentian dan Pulau Redang.

Komitmen ini memperlihatkan NRECC komited menyelesaikan masalah pemendapan di muara sungai dan hakisan pantai yang seterusnya dapat menyumbang dalam menjaga kemaslahatan penduduk tempatan.

**KEMENTERIAN SUMBER ASLI, ALAM SEKITAR DAN PERUBAHAN IKLIM  
(NRECC)  
18 JUN 2023**

---

Unit Komunikasi Korporat | Kementerian Sumber Asli, Alam Sekitar dan Perubahan Iklim (NRECC)  
Tel. : 03-8000 8000 | Faks : 03-8889 4763

